

INTERVJU: IBRAHIM HADŽIBAJRIĆ, NAČELNIK OPĆINE STARI GRAD SARAJEVO

Razgovarao: Mirza HADŽIJUSUFOVIĆ

SARAJEVO, 9. FEBRUARA (ONASA) - Načelnik Općine Stari Grad Sarajevo Ibrahim Hadžibajrić u intervjuu za Agenciju ONASA, između ostalog, govori o planiranim projektima za ovu godinu, razvoju turizma na području ove općine, kao i o unutrašnjem ustrojstvu Općine.

ONASA: Vaša očekivanja u ovoj godini, odnosno koje projekte ćete realizovati i šta će biti prioritet u radu Općine?

HADŽIBAJRIĆ: Planirali smo projekat izgradnje puta na Trčivodama, za stanovnike koji su u posljednjih 30 do 40 godina bili u poprilično teškoj situaciji. Taj put neće im stopostotno riješiti probleme, ali sigurno će im olakšati život i opšte stanje na tom terenu. Završena je kompletna procedura oko izdavanja urbanističko-građevinske dozvole, kao i revizija projektne dokumentacije, pošto je taj projekat već postojao. Finansijska sredstva za realizaciju ovog projekta obezbijedena su i nadam se da ćemo za dva mjeseca, vjerovatno u aprilu, krenuti s realizacijom ovog projekta. Na tenderu je odabran izvođač radova, a to je firma "Sarajevo putevi", koji su potvrdili da će u roku od 60 dana završiti radove.

Takođe, obezbijedena su sredstva i za sanaciju kompletnog Mjedeničkog potoka, za koji je završena kompletna dokumentacija, te izabran izvođač radova, tako da ćemo u ovoj godini pristupiti realizaciji tog projekta.

Sanacija ulice Bravadžiluk, u kojoj su radovi počeli 20. januara ove godine, je u toku. Sa izvođačem radova dogovoreno je da će radovi biti završeni za 75 dana, tako da očekujemo da će taj posao biti završen do početka aprila.

Tokom ljeta planirani su radovi na projektu hidrofleks postrojenja Mjesne zajednice "Sedrenik", tačnije ispod Špicaste stijene, gdje imamo jako puno objekata koji su bili devastirani tokom rata i u postratnom periodu. Vrijednost ovog projekta je 550.000 KM.

Planirana je i izgradnja mosta na Obhodži, vrijednog oko 170.000 KM. Imamo naznake da bi Vlada Turske mogla pomoći izgradnju ovog mosta, čime bi se obezbijedila lakša komunikacija za stanovnike Obhodže.

Izgradnja Osnovne škole "Sedrenik" trajni je projekat, na kojem se radi od 2007. godine. Prošle godine izdvojili smo 1.200.000 KM za ovu svrhu, a Vlada Kantona Sarajevo (KS) trebala bi učestvovati u sufinansiranju projekta.

Kvadrant 12, koji je poznat kao takozvana "Ceker pijaca", budući je poslovni objekat u vlasništvu Općine Stari Grad, koji se nalazi između ulice Mula Mustafe Bašeskije i Dženetića čikme. Pokrenuli smo proceduru, a tender za odabir izvođača radova privodi se kraju. Finansijska sredstva obezbijedena su prodajom općinskih poslovnih prostora.

ONASA: Da li će uskoro početi realizacija projekta izgradnje podzemnih garaža?

HADŽIBAJRIĆ: Procedura oko gradnje garaže u ulici Tekija čikma pokrenuta je prošle godine, a potpisan je i sporazum s Vakufskom direkcijom, jer su i oni vlasnici tog zemljišta. Građevinska firma "Suncokret" je investitor, ubrzo ćemo pokrenuti izgradnju podzemnih garaža, sa otprilike 170 parking mjesta. Međutim, tu nisu riješeni imovinsko-pravni odnosi. Važno je naglasiti da mi to nismo prodali investitoru, već dali u dugogodišnji zakup, mislim da će ugovor biti potpisan na 12 ili 15 godina, ali kada budu riješeni imovinsko-pravni odnosi.

Garaža kod Vijećnice i Šehercéhajine ćuprije takođe će biti data u zakup. Pokrenuli smo biološko ispitivanje zemljišta, idejni projekat je urađen, izvedbeni će se raditi po dobivanju geoloških nalaza, a nakon toga uslijediće raspisivanje konkursa.

ONASA: U kojoj fazi je gradnja Bakrbabine džamije?

HADŽIBAJRIĆ: Problem Bakrbabine džamije je nešto što se "vuče" zadnjih pet do šest godina. Komisija za nacionalne spomenike BiH traži da se ispoštuje zakon, a smatram da smo na dobrom putu da to privedemo kraju još u ovom mjesecu.

Vjerovatno će se u aprilu ili maju krenuti s gradnjom te džamije na Atmejdanu, a finansijska sredstva od 800.000 KM obezbijedio je turski grad Bursa.

ONASA: Da li ćete nastaviti s rekonstrukcijama ulica kao i u prošloj godini?

HADŽIBAJRIĆ: Asfaltiranje ulica biće u manjem obimu nego prošle godine, s obzirom da smo prošle godine završili rekonstrukciju 22 ulice. To će također zavisiti i od finansijskih sredstava, jer se tu treba uključiti i Direkcija za ceste KS, koja će u ovoj godini uraditi rekonstrukciju jednog dijela ulice Hamdije Kreševljakovića. Koliko ćemo biti u mogućnosti da izdvojimo finansijskih sredstava za rekonstrukcije ulica znaćemo tokom godine, jer to spada u takozvano tekuće održavanje i zavisi od visine budžeta.

Osim toga, moram istaći i projekte u vezi socijalnih potreba, boračke populacije i šehidskih porodica. To su kategorije ljudi koje nismo zaboravili i prilikom planiranja budžeta nismo išli na uštrb toga. Jedna smo od rijetkih općina koja te budžetske stavke nije mijenjala i nadam se da ćemo i ove godine moći ispoštovati taj dio.

ONASA: Pokazali ste hrabrost kada ste krenuli u borbu s neredovnim platišama. Kakvi su rezultati te akcije?

HADŽIBAJRIĆ: Naplata zakupnina poslovnih prostora u posljednja tri mjeseca veoma je dobra. Naplata u januaru ove godine iznosila je više od 522.000 KM, dok je u istom periodu prošle godine naplaćeno 228.000 KM. Ako zadržimo ovaj trend naplate bili bismo iznad planiranog nivoa za ovu godinu.

Smatram da bi naplata trebala biti i još veća, bez obzira što je vrijeme ekonomske krize, jer dugovanja su dugovanja, te se ona moraju izmiriti.

ONASA: Kakvo je stanje u Općini što se tiče zapošljavanja mladih kadrova?

HADŽIBAJRIĆ: Unutrašnje ustrojstvo Općine završeno je još prošle godine, mada ima određenih stvari koje treba uraditi. Nastojacu da podmladim kadar u Općini, jer čak 69 posto zaposlenih spada u kategoriju od 45 do 60 godina. Podaci su tačni i neumoljivi, te ćemo morati dati šansu i mlađim ljudima.

To ću nastojati uraditi u narednom vremenskom periodu, pa makar to bilo i nauštrb povećanja administracije i smanjivanja plaća. Spreman sam na to, jer je vrijeme da se razbije ova kolotečina, koja ne samo da vlada u Općini, već i u drugim institucijama.

ONASA: Nedavno je pokrenuta inicijativa da Općina Stari Grad bude jedan od nosilaca razvoja turizma u Kantonu Sarajevo (KS) i BiH. Smatrate li da će to privući veći broj turista u ovu općinu, a i Sarajevo?

HADŽIBAJRIĆ: U okviru te inicijative u aprilu ove godine trebali bi ugostiti stranu delegaciju. Riječ je o 160 turističkih operatera iz cijelog svijeta, gdje bi im na profesionalniji način približili BiH, kako bi oni na adekvatan način mogli predstaviti turističku ponudu BiH u svojim zemljama. Općina Stari Grad najposjećenija je u KS, a prema zvaničnim podacima i u BiH. Ta posjeta trebala bi turističke kapacitete BiH približiti tim zemljama i zadržati turiste više od dva do tri noćenja, odnosno da to ne bude samo proputovanje, već da to bude destinacija gdje se može planirati i godišnji odmor.

Vlada Turske, pomoću Turkish Airlinesa, obezbijediće povratne karte za sve turističke operatere, njih oko 160, koji će doći iz 70 zemalja. Općina Stari Grad daće podršku u organizacionom smislu i najvjerovatnije obezbijediti, u saradnji s drugim općinama, prevoz za učesnike ovog skupa.(kraj)